

## 每週經課朗誦經文(巴克禮漢羅/教羅)2013/02/17

### 共同經課 - 1 申命記二十六章一節~十一節

1 你已經到耶和華你 ê 上帝所賞賜你做業 ê 地，承接來 khiā 起伊，2 就 tiòh tùi 耶和華你 ê 上帝賞賜你 ê 地，將所收 tak 項起頭熟 ê 土產，thèh 淡薄，hē tī 筐裡，去耶和華你上帝所 beh 揀安置伊 ê 名 ê 所在；3 tiòh 去見當時做祭司 ê，kā 伊講，我今 á 日對耶和華你 ê 上帝講明，我已經到耶和華對咱 ê 列祖 chiù-choā 賞賜咱 ê 地。4 祭司就 tùi 你 ê 手接 hit 筐，來 hē tī 耶和華你上帝 ê 壇前。5 你 tiòh tī 耶和華你上帝 ê 面前講：我 ê 祖是一個 teh-beh 死 ê A-lân 人，落去埃及寄腳 tī-hia，人額少少；tī-hia 成做一國大 koh 強，人額 koh choē。6 埃及人 phái<sup>n</sup> 款待阮，苦楚阮，用苦工 kah 阮做；7 Tùi hit-tiáp，阮哀求耶和華阮列祖 ê 上帝，耶和華聽阮 ê 聲，看見阮 ê 苦楚，阮 ê tiòh 磨，阮 ê 壓迫；8 耶和華就用大權能 ê 手，kap 伸出 ê 手骨，kap 大 thang 驚 ê 事，kap 神蹟、奇事，chhoā 阮出埃及，9 koh choā 阮到 chit 所在，用 chit-ê 地賞賜阮，就是流奶 kap 蜜 ê 地。10 看 ah，chit-ê 地起頭熟 ê，耶和華 ah，你所賞賜我 ê，我 ta<sup>n</sup> 已經帶來。後來你 tiòh 將伊 hē tī 耶和華你上帝 ê 面前，tī 耶和華你上帝 ê 面前敬拜伊。11 你 kap 利未人，以及 lín 中間 ê 出外人，tiòh 因為耶和華你上帝所賞賜你 kap 你 ê 家眷一切 ê 福份來歡喜。

### 共同經課 - 2 詩篇九十一篇一節~二節，九節~十六節

1 Tiàm tī 至高 ê 隱密 ê 所在 ê，Hit-ê 人 beh khiā 起 tī 全能 ê 蔭影。2 論到耶和華，我 beh 講，伊是我逃閃 ê 所在，是我 ê 山寨；是我 ê 上帝，我所 oá 靠 ê。9 因為耶和華你是我逃閃 ê 所在；你 bat 用至高 ê 做你 khiā 起 ê 所在；10 就災害 boē 到 tī 你，瘟疫亦 boē oá 近你 ê 布棚。11 因為伊 beh 為 tiòh 你吩咐伊 ê 使者，Tī 你一切 ê 路保護你。12 In beh 用手扶你，免得你 ê 腳 tak-tiòh 石。13 你 beh 踏獅 kap 毒蛇，Lap 獅 á-thùn kap 大尾蛇。14 因為伊真疼我，我就 beh 救伊；因為伊 bat 我 ê 名，我就 beh 安置伊 tī 高 ê 所在。15 伊求叫我，我就 beh in 伊；伊 tī 危急 ê 時，我 beh kap 伊 tī-teh；我 beh 救伊，hō伊尊貴。16 我 beh 用長歲壽 hō伊滿足，Hō伊看見我 ê 救恩。

### 共同經課 - 3 羅馬書十章八 b 節~十三節

8 是講，言語是近 tī 你，是 tī 你 ê 嘴，tī 你 ê 心，就是阮所傳 chit-ê 信 ê 言語；9 就是你若用嘴認耶穌做主，用心信上帝 hō伊 tùi 死人中起來，就會得 tiòh 救。10 因為人用心信，致到得 tiòh 義；用嘴認，致到得 tiòh 救。11 聖經講，見若信靠伊 ê 人不致見笑。12 因為猶太、希利尼 lóng 無分別；siāng 一個主是眾人 ê 主，款待 lóng 總求伊 ê 人極其富裕。13 因為見若求叫主 ê 名 ê 人 beh 得 tiòh 救。

### 共同經課 - 4 路加福音四章一節~十三節

1 耶穌受聖神充滿，tùi 約旦河 tò 來；hō聖神 chhoā 伊 tī 曠野裡四十日久，hō魔鬼試伊。2 chiah-ê 日 ê 中間無食甚麼物，後來就 iau。3 魔鬼 kā 伊講，你若是上帝 ê Kiá<sup>n</sup>，tiòh kah chit-ê 石變做餅。4 耶穌應伊講，有記載講，人 ê 活 m-nā oá 靠餅。5 魔鬼 koh choā 伊 peh 上高，一目 ni h 久用天下萬國 hō伊看，6 就 kā 伊講，Chit-ê 一切 ê 權，kap in ê 榮光我 beh hō你；因為 chit-ê 已經交 hō我，chhut-chāi 我 beh hō甚麼人就 hō伊；7 所以你若拜 tī 我 ê 面前，就 lóng 總是你 ê。8 耶穌應伊講，有記載講，Tiòh 拜主，你 ê 上帝，獨獨服事伊 nā-tiā<sup>n</sup>。9 Koh choā 伊到耶路撒冷，hō伊 khiā tī 殿 ê 尾溜，kā 伊講，你若是上帝 ê Kiá<sup>n</sup>，tiòh tùi chia 家己 tiò 落去；10 因為有記載講，伊 beh 為 tiòh 你命令伊 ê 天使保護你；11 Koh 講，In beh 用手扶你，免得你 ê 腳 tak-tiòh 石。12 耶穌應伊講，有講，莫得試主，你 ê 上帝。13 魔鬼已經盡 tak 項 ê 試，就暫時離開伊。